

Junie
2012Posbus 20
Hermanus 7200

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445
24 Uur Beheerkamer	028 313 8000/8111	
Brandweer	028 312 2400	

Bulletin

Amptelike nuusbrieff van Munisipaliteit Overstrand

FRANSKRAAL NASIONAAL AANGEWYS AS INDRUKWEKKENDSTE KLEINER AANLEG

BLOUDRUPPEL VERBETERING

Vyf van die 98 Bloudruppels wat aan Suid-Afrikaanse waterdiensowerhede toegeken is vir prestasie ten opsigte van drinkwater-gehaltebestuur in 2011 is deur Munisipaliteit Overstrand ingepalm.

Die nasionale Bloudruppelverslag oor die evaluering van watergehalte is op Maandag, 7 Mei 2012, deur die Minister van Water en Omgewingsake, Edna Molewa, tydens die jaarlikse konferensie van die Waterinstituut van Suid-Afrika in Kaapstad bekendgestel.

Die Franskraal-watersuiweringswerke naby Gansbaai het die nasionale toekenning vir die indrukwekkendste kleiner aanleg ontvang.

In totaliteit, het Munisipaliteit Overstrand 96,82 persent in die evaluering behaal en is nou twaalfde op die nasionale en vyfde op die Wes-Kaapse lys. Dit is 'n merkwaardige verbetering op verlede jaar se 90,56 persent en 24ste posisie nasionaal.

Die aanlegte wat vanjaar Bloudruppel-toekennings ontvang het, is Hermanus (Preekstoel), Gansbaai (Franskraal), Buffelsrivier (Hangklip), Kleinmond en Pearly Beach. Franskraal en Buffelsrivier het silwer ontvang omdat hulle vir twee opeenvolgende jare Bloudruppel-status verdien het.

Drie aanlegte – Stanford Oog, Buffeljagsbaai en Baardskeedersbos – het nie vir Bloudruppel-toekennings gekwalifiseer nie maar het nogtans meer as 90 persent behaal.

Die Bloudruppel-telling is nie slegs 'n aanduiding van watergehalte nie maar is 'n geweegde totale evaluering van die volgende vyf kriteria: waterveiligheidsbeplanning, gehaltebestuursproses vir drink-



Van links: Thoko Sigwaza, hoofdirekteur van institusionele oorsig by Waterwese, Stephen Muller, direkteur: infrastruktuur en beplanning by Overstrand, Maxwell Sirenya, direkteur-generaal van Waterwese, Hanré Blignaut, adjunkdirekteur vir water by Overstrand, rhr Pieter Scholtz, Onderburgemeester, Rejoice Mabudafhasi, Adjunk-minister van Waterwese, Patrick Robinson en De Wet Nel, munisipale amptenare betrokke by waterdienste.

water, voldoening aan drinkwatergehalte, bestuurs-aanspreeklikheid en plaaslike regulering, en batebestuur.

Volgens die Bloudruppel-verslag, was Munisipaliteit Overstrand se verbetering merkwaardig, en alle betrokke amptenare kan met reg trots wees op hulle toewyding. Die verbetering in chemiese nakoming is ook as 'n merkwaardige prestasie beskryf. Kommer is egter uitgespreek oor waterverliesyfers, en daar moet veral aandag gegee word aan die Buffelsrivierstelsel aangesien sy verbruiksyfers, vergeleke met ander voorsieningstelsels, buitensporig is. Die departement het 'n versoek gerig vir 'n aanvaarbare plan om doeltreffende watergebruik te verbeter.

Die evaluering van afvalwatergehaltebestuur vir

Groendruppel-toekennings sal eers in Augustus vanjaar 'n aanvang neem aangesien daar besluit is om evaluering vir Bloudruppel- en Groendruppel-toekennings op 'n jaarlikse grondslag af te wissel.

BLOUDRUPPEL-TELLINGS

AANLEG	2012	2011	2010
Groter Hermanus	97.93	87.23	75.31
Groter Gansbaai	97.12	95.10	63.81
Kleinmond	95.27	93.09	60.06
Pearly Beach	95.22	94.31	Nie geëvalueer nie
Buffelsrivier	95.00	95.07	63.83
Buffeljagsbaai	93.81	75.37	Nie geëvalueer nie
Stanford Oog	92.73	95.15	Nie geëvalueer nie
Baardskeedersbos	91.57	93.68	Nie geëvalueer nie

STRANDROLSTOEL SORG VIR GROOT VREUGDE

Francois Retief, 'n gestremde jong man van Pretoria, was einde Maart in Hermanus vir 'n vakansie saam met sy ma, Sonja, en sy grootouers.

Die vorige keer toe hulle hier was – 'n paar jaar gelede – moes Billy, 'n lewensredder, vir Francois optel en tot in die water en terug dra omdat hy nie met sy rolstoel oor die los sand kon beweeg nie. Dit was 'n besondere belewenis vir hom en sy ma omdat die jong manne daarna 'n kringetjie om hulle gevorm en 'n gebed gedoen het.

Groot was hul verbasing toe hulle vanjaar by Grotto aankom en by die lewensredders se huisie nie vir Billy vind nie maar wel 'n rolstoel wat 100% voldoen aan enige rolstoelgebruiker se behoeftes om op die strand

en soveel te meer in die water te kan kom.

Vir die eerste keer in 15 jaar kon Sonja en Francois vir kilometers ver langs die strand beweeg, saam skulpies optel en in die water rondspeel. Francois kon die branders voel breek deur die seil van die rolstoel se sitplek en uitbundig lag wanneer die yskoue water oor hom spoel. Hy kon gemaklik sit sonder dat die sand, soos die vorige keer, hom skuur en die branders hom rondmaal.

Sonja sê baie van die vakansiegangers het moontlik vir die eerste keer gesien hoe die 'rolstoel' werk en met hulle kom gesels. Sy het groot waardering vir almal wat dit moontlik gemaak het dat 'n gestremde persoon,

saam met sy versorgers, 'n heerlike dag op die strand kon deurbring, sonder om te sukkel, te swoeg en te sweet, sonder bloukolle van struikel en val, sonder spiere wat in spasmas saamtrek ... om sommer net 'normaal' 'n Godgewe helder sonskyndag op die strand te kon geniet.

* Op 12-jarige ouderdom was Francois Retief 'n belowende jong krieketspeler, maar sy lewe het in 1996 onherroeplik verander toe 'n besope man hom op 'n sypaadje omry. Ernstige breinbeserings het hom agt maande in 'n koma en vandag as kwadrupleeg gelaat. Met toegewyde versorging deur familie en vriende het Francois

in so 'n mate herstel dat hy tot op 21 jarige ouderdom by 'n spesiale skool opleiding kon ontvang en by 'n sentrum vir gestremdes kon inskakel. Hy het 24-uur-versorging nodig en is geheel en al op sy ma aangewese en moet oral saam met haar beweeg.



NEEM KENNIS ASB

DUBBELTARIEF
VIR TENKERDIENS
NA DRIE

Indien 'n kliënt na 15:00 vir die dienste van 'n riooltenkwa op dieselfde dag nog aanvra, word die diens teen dubbeltarief gehef. Die rede daarvoor is dat die munisipaliteit se tariewe werklike koste moet verhaal en die waarskynlikheid baie groot is dat só 'n diens eers na ure gelewer kan word.

TJEKS BY
DERDE PARTYE

Neem asseblief kennis dat tjeks nie meer vir die betaling van munisipale rekeninge by derdeparty-instansies (byvoorbeeld die Poskantoor, Pick 'n Pay, Checkers, ens.) aangebied kan word nie. Probleme word toenemend ondervind met sodanige tjeks wat deur die banke geweier word.

SLAGGEREED VIR SAKE

Vyftien opkomende kontrakteurs uit Overstrand-geledere wat verlede jaar in medewerking met die Munisipaliteit Overstrand aan die Departement van Vervoer en Openbare Werke se Qingqavaardigheidsontwikkelingsprogram deelgeneem het, het op Woensdag, 2 Mei 2012, hulle sertifikate ontvang.

Burgemeester Nicolette Botha-Guthrie het tydens dié geleentheid in die Overstrand Burgersentrum die sertifikate oorhandig. In haar boodskap van gelukwense het sy klem gelê op die belang van ekonomiese ontwikkeling en die konstruksiebedryf in Overstrand.

Hierdie vaardigheidsontwikkelingsprogram het ten doel gehad om opkomende kontrakteurs vir mededinging in die konstruksiebedryf toe te rus. Hulle is onderrig in doeltreffende mededinging om tenders deur te leer van die prosesse, reëls, regulasies en riglyne wat op hierdie bedryf betrekking het.

By dieselfde geleentheid is die



Van links: Shaun Moses, Bestuurder: Plaaslike Ekonomiese Ontwikkeling, Thozamile Ngcozela (DVOW), Phillip Kapa, Pheko Rasaborang, Jay-Cee Arendse, Ruben Matinka, Overstrand Burgemeester, Nicolette Botha-Guthrie, Henry Spandiel, Veronique Isaacs (DVOW), Dansile Mdoysi, Paul van der Merwe, Willem Thompson, Mangezi Mbodeni, Ruth Lusiba en Elsa Europa

Siyenyuka-grondslagfaseprogram vir 2012/2013 van stapel gestuur. Hierdie program gaan in hoofsaak daarop fokus om eerste- en tweedevlak-gradeering te verwerf soos toegeken deur die ontwikkelingsraad vir die konstruksiebedryf. Na verwagting sou die evaluering van deelnemers op Dinsdag,

22 Mei 2012 plaasgevind het.

Om meer inligting te bekom oor opkomende kontrakteurs en die Siyenyuka-grondslagfaseprogram, kontak Chantelle Hill in Overstrand se Direktoraat Plaaslike Ekonomiese Ontwikkeling by 028 313 5012 of e-pos chill@overstrand.gov.za.



Van links: Katy Sarah Oktober, Burgemeester Nicolette Botha-Guthrie en Me Leslie Downie

OUDIOKONTRAKTE OORHANDIG

Die eerste groep van dertig nuwe huiseienaars in die laekoste-behuisingsprojek op Kleinmond het in Mei hul titelaktes ontvang tesame met CD-skywe waarop die besonderhede van hul behuiskontrakte verbaal aan hulle verduidelik word.

Burgemeester Nicolette Botha-Guthrie het die munisipaliteit se regs-konsultant, Leslie Downie, gelooft vir die groot rol wat sy in hierdie inisiatief vervul het.

Volgens die Burgemeester het Downie beseft dat geletertheid 'n probleem is en het sy gereël vir die oudio-opnames van die verkoopsooreenkomste vir die lae koste behuising as 'n BLISS-projek. BLISS (Business Law Informal Sector Solutions™) is 'n handelsmerk wat gebruik word om die sakeregte van benadeelde mense te bevorder.

Die oudio-CD's is deur Bandhulp vir Blindes en Leesgestremdes opgeneem. Befondsing vir die CD's vir die Kleinmond-ontwikkeling is geskenk deur ondersteuners van die BLISS-platform as 'n liefdadigheidsaanderneming om plaaslike regering te ondersteun in sy dienslewering aan armes wat laaggeletterd is.

Hierdie oudio-ooreenkomste sal die begunstigdes bemagtig om hul private eienaarskapregte te verstaan en om

binne die bepalinge van die Wet op Verbruikersbeskerming te handel. Die wet reguleer die lewering van dienste aan laaggeletterdes en het ten doel om die maatskaplike en ekonomiese welstand van benadeelde verbruikers te bevorder.

Oudiokontrakte is 'n weldeurdragte stap om plaaslike gemeenskappe met 'n lae geleterheidsvlak behoortlik in te lig oor hulle kontraktele verhoudings en dit is dus nie verbasend dat die provinsiale mensevestigingskantoor ook belangstelling in die kontrakte toon nie.

Die Burgemeester het voorts gesê al 410 laekostebehuisingseenhede is teen 15 Desember 2011 aan die betrokke begunstigdes oorhandig. In die aanloop daartoe is 465 aansoeke verwerk, waarvan 27 onsuksesvol was en 'n verdere 28 hulle aan die proses onttrek het. Onder die 27 mislukte aansoeke was daar verskeie wat nie aan die nasionale kriteria voldoen het nie, maar verskeie gevalle is aan die lig gebring waar valse inligting onder eed vir die subsidieaansoeke verskaf is.

Van die begunstigdes het 214 in die informele nedersetting Overhills gewoon en is hul tydelike strukture tydens die okkupasie van die nuwe huise gesloop en uit die gebied verwyder.

MORELE STANDAARDE-INISIATIEF

MORALITEITSKRISIS?

In ons land en samelewing is daar, soos elders in die wêreld, tekens dat ons 'n ernstige moraliteitskrisis beleef. Ons sien die gesigte van hierdie krisis en sy vernietigende gevolge elke dag in die media en in ons persoonlike ervarings.

Koopman en Vosloo* beskryf die gesigte van die krisis onder meer soos volg:

- “'n Toename in geweld, misdadigheid en vandalisme is sekerlik een van die duidelikste gesigte van ons moraliteitskrisis... dit dra by tot 'n kultuur van vrees waarin agterdog en bitterheid ons verhoudings kenmerk eerder as sorg en gasvryheid.
- Hierdie sake (kan) nie van armoede en werkloosheid losgemaak word nie. Die morele implikasies van laasgenoemde op gesinne en gemeenskappe is geweldig.
- Korrupsie en 'n algemene kultuur van oneerlikheid verhoed dat 'n regverdiger samelewing geskep word.
- Op individuele vlak word mense by hul werk en in hul verhoudings met moeilike morele keuses gekonfronteer... en ervaar verder dat die druk van die samelewing net té groot is dat hulle 'n lewe van integriteit kan volhou.
- Daar is (ook) 'n groeiende sosiale apatie om betrokke te raak by die nood van ander mense en by sake van openbare belang.”

En hierby kan sekerlik gevoeg word die voorkoms van dwelms en drankmisbruik veral onder die jeug en nog meer.

Hierdie gesigte kom in 'n meerderde of mindere mate voor in elke gemeenskap, ook by ons. Op die lange duur kan daar net van die krisis werk-

gemaak word daar waar waardes in die eerste plek vasgelê is.

Ons weet dat morele waardes grootliks van jongs af vanuit ons ouerhuise, ons kerk en godsdienste en die skool vasgelê word. Ons persoonlike lewenservarings en die voorbeeld en invloed van rolmodelle en leiersfigure dra verder by tot die vestiging van waardes in ons morele karakter. Hierdie waardes is persoonlike beginsels waarin ons ten diepste glo en waarvolgens ons lewensbesluite neem en wat ons gedrag en verhoudings beïnvloed. Hoe ons hulle ervaar, bepaal die kwaliteit en karakter van ons burgerskap in die gemeenskap waarvan ons deel is.

Min mense sal verskil dat Verantwoordelikheid, Respek, Geregteerdheid en Omgee die onderliggende waardes van Goeie Burgerskap is en dat dit goed en reg is dat mense hierdie waardes in 'n Christelik morele samelewing sal ervaar. Soos in 'n vorige rubriek aangedui, kan 'n gemeenskap eintlik nie funksioneer sonder dat mense bepaalde waardes deel en nastreef nie. Dit skep 'n positiewe lewensruimte gekenmerk deur omgee, harmonie, verdraagsaamheid en 'n skoon leefstyl.

Indien ons ervaar en erken dat die gesigte van die moraliteitskrisis ook in ons gemeenskap sigbaar is, bied dit 'n geweldige uitdaging aan ouers binne hul gesinne, ons kerkleiers, gemeenskapsleiers en sakeleiers. Of ons kan dit gelate aanvaar as 'n krisis waaraan ons niks kan doen nie en wat eintlik iemand anders se probleem is.

E Kretschmer, MSI-projek, e-pos ernstes@vodamail.co.za of sel 082 412 4538

(*Koopman N & Vosloo R, 2002. Die ligtheid van die lig: Morele oriëntasie in 'n postmoderne tyd.)